



Innkalling av Alver formannskap

Møtedato: 11.11.2021
Møtestad: Helsehuset, møterom Nordhordland
Møtetid: 09:00 -

Eventuelle forfall må meldast til <https://www.alver.kommune.no/innhald/politikk-og-hoyringar/politikk/melde-forfall-til-politiske-mote/>

Varamedlemmer møter berre etter nærare avtale.

Orienteringar:

Kl. 0900 - BKK trafostasjon i Knarvik
Kl. 0930 - Nordhordlandspakken
Kl. 1030 - Sakshandsaming

Sakliste

Saknr	Tittel
094/21	Godkjenning av innkalling og sakliste
095/21	Godkjenning av møteprotokoll
096/21	Kommuneplanen sin samfunnsdel 2022 – 2034. Høyring og offentlig ettersyn
097/21	Retningslinjer for tildeling av tilskot til private barnehagar
098/21	Avvikle interkommunalt samarbeid ved Radøy interkommunale busenter
099/21	KNARA – Hovudreinseanlegg Knarvik - Supplerande vurderingar
100/21	Tilleggsfinansiering prosjekt 34001 Nytt vassbehandlingsanlegg Hestdal
101/21	Søknad om å etablere vinmonopol på Lindås
102/21	Utviding av IKT Nordhordland kommunalt oppgåvefelleskap
103/21	Gebyr- og betalingssatsar - prinsipp
104/21	Melding/orientering til formannskapet 11.11.2021

4. november 2021

Sara Hamre Sekkingstad
ordfører

Tove-Mette Arnø Fyllingen
møtesekretær

Arkiv: <arkivID><jplD>
JournalpostID:
Sakshandsamar:
Dato: 04.11.2021

Saksframlegg

Saksnr.	Utvæl	Møtedato
094/21	Alver formannskap	11.11.2021

Godkjenning av innkalling og saksliste

Rådmannen sitt framlegg til vedtak:

Innkalling og saksliste vert godkjent.

Arkiv: <arkivID><jplD>
JournalpostID:
Sakshandsamar:
Dato: 25.10.2021

Saksframlegg

Saksnr.	Utval	Møtedato
095/21	Alver formannskap	11.11.2021

Godkjenning av møteprotokoll

Rådmannen sitt framlegg til vedtak:

Møteprotokollen vert godkjent.

Vedlegg i saken:

18.10.2021 Protokoll - Alver formannskap - 14.10.2021 1627617

Arkiv:

<arkivID><jplD>
Plannavn-
Kommuneplanen sin
samfunnsdel, Komnr-
4631, FA-L1

JournalpostID:

Sakshandsamar:

Dato:

04.11.2021

Saksframlegg

Saksnr.	Utval	Møtedato
096/21	Alver formannskap	11.11.2021

Kommuneplanen sin samfunnsdel 2022 – 2034. Høyring og offentlig ettersyn
Rådmannen sitt framlegg til vedtak:

- Med heimel i plan- og bygningslova § 11-14 vedtar Alver kommune å sende forslag til kommuneplanen sin samfunnsdel 2022 – 2034 ut på høyring og offentlig ettersyn.
- Høyringsfrist er 1. februar 2022

Politisk handsaming

Saka skal avgjerast i formannskapet

Kva saka gjeld:

- I denne saka skal formannskapet vurdere høyringsutkastet til kommuneplanen sin samfunnsdel, og legge den ut på 1. gongs høyring og offentlig ettersyn.

Saksutgreiing

Bakgrunn og fakta.

Kommuneplanen sin samfunnsdel er den øvste planen i det kommunale planhierarkiet og er heimla i §11-2 i plan- og bygningslova. I kommuneplanen sin samfunnsdel skal kommunen ta stilling til langsiktige utfordringar, mål og strategiar for kommunesamfunnet som heilskap og kommunen som organisasjon. Samfunnsdelen er tett kopla til og legg føringar for arealdelen. Samfunnsdelen peiker på kva hovudutfordringar kommunen har og kva vi ønskjer å oppnå med samfunnsutviklinga. Arealdelen skal vise korleis vi skal bruke areala i kommunen for å oppnå dei mål og satsingar som er sett i samfunnsdelen.

Samfunnsdelen ser langt fram og visar korleis politikarar og tilsette i Alver kommune kan løyse kommunen sine utfordringar ilag med innbyggjarar, næringsliv, nabokommunar og andre regionale og statlege aktørar. Planen teiknar det store biletet, og blir følgt opp av detaljar i kommunedelplanar, temaplanar og handlingsplanar. Samfunnsdelen er eit overordna styringsdokumentet, og angår alle som bur, jobbar og lever i Alver. Ettersom Alver kommune blei etablert 01.01.2020, er dette den første utgåva av kommuneplanen sin samfunnsdel .

Planprosess og medverknad

Planprogrammet til kommuneplanen sin samfunnsdel blei vedtatt av formannskapet hausten 2020. Planprogrammet gjer greie for føremålet med planarbeidet, planprosessen, plantema og opplegget for medverknad.

Frå september 2020 til mars 2021 blei det gjennomført ein medverknadsprosess ut mot innbyggjarar og næringsliv. Medverknadsprosessen var ein felles prosess saman med kommunedelplan for oppvekst og kommunedelplan for helse og omsorg. I medverknadsprosessen har det vore møte og samtalar med innbyggjarar, næringsliv, råd, politikarar, barn, unge og tilsette i kommunen.

Medverknadsprosessen er samla i sju rapportar, som ligg som vedlegg til saka:

1. Melding frå folket
2. Nærsesterstudie
3. Samtalar med råda
4. Tenketank med næringslivet
5. Mitt Alver
6. Digital samfunnsdialog
7. Melding frå administrasjonen

Etter medverknadsprosessen med innbyggjarar og andre aktørar, starta det politiske strategiarbeidet med styringsgruppermøte i formannskapet 24. mars. I løpet av våren blei det gjennomført politiske arbeidsmøte med ulike utval og kommunestyret. Grunnlaget for desse arbeidsmøta var kunnskapsgrunnlaget frå medverknadsprosessen. Først blei det gjennomført ein analysefase, der alle innspel frå både medverknadsprosess og politiske arbeidsmøte er samla i ei hovudanalyse. Denne analysen er brukt i arbeidet med peike ut visjon, mål og vegval som er lagt inn i endeleg høyringsutkast.

Høyringsutkastet til samfunnsdelen blei lagt fram for politisk handsaming i formannskapet 2. september (sak 76/21). Formannskapet gjorde følgjande vedtak i saka:

- *Formannskapet ser behov for ytterlegare arbeid, presiseringar og tydeliggjering i samfunnsplanen og vil difor ikkje leggja dokumentet på høyring og offentleg ettersyn på noverande tidspunkt. Formannskapet ber om eit nytt styringsgruppermøte for samfunnsplanen innan utgangen av september, der styringsgruppa får høve til å leggja inn bestillingar og forventningar som må arbeidast inn i planen før denne blir lagd ut på høyring.*

I etterkant av formannskapsmøtet 2. september er det gjennomført to styringsgruppermøte der styringsgruppa har kome med bestillingar på kva dei ønskjer å presisere og tydeleggjere i planen. Mellom anna er det lagt inn ein framtidsvisjon, som fortel kva ambisjon ein har for utviklinga fram mot 2040. Det er lagt inn fire hovudmål med delmål og konkrete strategiske vegval. Styringsgruppa har også bedt om eit kunnskapsgrunnlag for å peike ut nye senterstruktur og nye nærsester, og framlegg til ny senterstruktur med fleire nye nærsester er med i høyringsutkastet.

Rammer for arbeidet

Kommuneplanen sin samfunnsdel byggjer på FN sine berekraftsmål. Berekraftsmåla ser miljømessig, økonomisk og sosial utvikling i samanheng. Vi må tenke heilskapleg når vi skal løyse utfordringane i dag og i framtida, og det er dette som er utgangspunkt for visjon, mål og vegval som ligg i samfunnsdelen.

Andre viktige føringar for kommuneplanen sin samfunnsdel:

- Lovar og forskrifter
- Nasjonale forventningar til regional- og kommunal planlegging
- Nasjonale planretningslinjer
- Regionale planar
- Intensjonsavtalen for ny kommune (vedtatt i 2016)
- Strategi- og styringsdokumentet for samfunnsutvikling (Vedtatt i 2019)
- Scenarioanalyse Nordhordland
- Planprogrammet til samfunnsdelen
- Utfordringsnotatet (grunnlag for planstrategi)
- Folkehelsedokumentet

Høyring og offentleg ettersyn

Høyring av planframlegg skal etter plan- og bygningslova § 11-14 vere minst 6 veker. Kommuneplanen er ein viktig utviklingsplan for Alver og kommunen bør derfor vurdere å utvide høyringsperioden, slik at flest mogleg kan kome med innspel. Det blir lagt opp til ein aktiv høyringsperiode der kommunen inviterer seg inn på etablerte arenaer i heile kommunen. Etter høyringsperioden blir det handsaming av merknader med mål om endeleg vedtak i kommunestyret våren 2022.

Oppbygging av samfunnsdelen

I den innleiande delen av planen blir rammene for planarbeidet presentert, mellom anna er FN sine berekraftsmål ein sentral premiss for framtidig samfunnsutviklinga. Vidare presenterer planen innspela frå medverknadsprosessen og hovudutfordringane frå analysefase. Det er hovudutfordringane som er grunnlaget for kva ein ønskjer å oppnå, og kva for visjon, mål og strategiske vegval kommunen har mot 2040.

I kapittel 5 blir framtidsvisjon, hovudmål, delmål og vegval presentert. Det er fire hovudmål med tilhøyrande delmål (Dette vil vi oppnå) og vegval (slik skal vi gjere det). I kapittel 6 viser planen korleis vi skal utvikle areala til kommunen i tråd med dei mål og vegval som ligg i kap 5. Her ligg det sentrale prinsipp for arealbruk, som er viktig i det vidare arbeidet med kommuneplanen sin arealdel. Prinsippa i kap 6 skal vere eit bindeledd mellom samfunnsdelen og arealdelen.

Vurdering

Framlegget til høringsutkast i denne politiske saka er bygd på framlegget frå 2. september med dei endringar og bestillingar som er kome frå styringsgruppemøta 29. september og 27. oktober. Rådmannen har i stor grad justert dokumentet i tråd med bestillingar frå styringsgruppa, men det er også bestillingar og innspel som har behov for ei nærare fagleg vurdering. Desse vurderingane vil bli lagt fram i denne saka.

1. Struktur

Det er gjort strukturelle endringar i tråd med tilbakemelding frå styringsgruppa. Utfordringar og fortrinn er tatt inn som eit eige kapittel (kap 4). Kapittel 5 er omarbeida med ein framtidsvisjon, mål og vegval, og det er lagt inn eit eige delkapittel om korleis vi skal utvikle organisasjonen for å nå dei måla som ligg i planen.

2. Framtidsvisjonen

I kapittel 5.1 er det lagt inn ein framtidsvisjon som beskriv kva kommunen skal satse på mot 2040. I styringsgruppemøte 27. oktober kom det innspel om å leggje til følgjande tilleggstekst i visjonen: *Alver skal vera eit nasjonalt tyngdepunkt for vekst og utvikling innan grøn industri.*

Rådmannen si vurdering

Mongstad industriområde og mange av verksemdene i kommunen har ein sterk industriell posisjon, og kan spele ei sentral rolle i utvikling av framtidig berekraftig industri. Det er mange faktorar som spelar inn for å bli eit nasjonalt tyngdepunkt, og det er uklart korleis kommunen skal kunne måle at ein har tatt ein slik posisjon. I det vidare arbeidet med strategi- og handlingsplanar er det viktig å konkretisere korleis ein skal oppnå måla og kven som skal bidra. Rådmannen foreslår følgjande tekst for framtidsvisjonen:

Vi vil at det skal vere attraktivt å leve, bu, arbeide og skape verdiar i Alver kommune – og ha vekst i folketal, arbeidsplassar og bedrifter. Vi vil vere eit nasjonalt tyngdepunkt for vekst og utvikling innan grøn industri. Vi vil utvikle heile kommunen.

3. Folketalsvekst – 40.000 innbyggjarar i 2040

I styringsgruppemøte 27. oktober kom det bestilling på å legge inn eit mål om folketalsvekst på 40.000 innbyggjarar i 2040. I tillegg er det ønskje om meir omtale rundt vekst og positiv utvikling i visjonskapittelet.

Rådmannen si vurdering


Per 2. kvartal 2021 hadde Alver 29 424 innbyggjarar. For å nå målet om 40 000 innbyggjarar i 2040 må folketalet altså auke med 10 576 personar dei neste 19 åra. Folketalsutviklinga avhenger av fire tilhøve:

1. Kor mange barn kvinnene i kommunen får («*fruktbarheit*»)
2. Kor lenge innbyggjarane lever (venta levealder)
3. Flyttestraumane mellom Alver og andre norske kommunar
4. Migrasjonsstraumane mellom Alver og utlandet.

Dei to fyrste av desse har historisk endra seg sakte, og det er unaturleg å legge til grunn at store endringar av desse vil bidra til å nå målet om 40 000. Viss målet skal nåast, må det altså skje ved endra flytting og migrasjon. Ved å legge til grunn SSB sine framskrivingar for fruktbarheit og levealder -som inneber at begge desse utviklar seg sakte i *positiv* retning, kan vi vise kor mykje flytte- og migrasjonsstraumane må endre seg for å nå målet om 40 000. Denne analysen syner at den summerte nettoflyttinga og migrasjonen for Alver må halde seg mellom 390 og 450 personar årleg for at målet om 40 000 innbyggjarar skal nåast. Til samanlikning var talet 376 i 2007, som er det foreløpige rekordåret. I 2020 var talet 18 (Sjå figur 1).

Ei anna utfordring er sysselsetting til ein så stor befolkning. Viss yrkesdeltakinga og pendlarmønster er på same nivå som i dag, må talet på arbeidsplassar i Alver auke frå dagens 10.800 til 14.000 i 2040. I gjennomsnitt må

talet arbeidsplassar auke med 1,4 prosent årleg. Dei siste ti åra har gjennomsnittsvæksten for arbeidsplassar i Alver vore 0,5%. Eit mål på 40.000 i 2040 vil også skape utfordringar for kommunen sine tenester, og når det står som eit konkret mål i kommuneplanen sin samfunnsdel bør ein planlegge samfunnet og tenestene etter dette målet. Rådmannen anbefaler at det ikkje blir lagt inn eit måltal på 40.000 i 2040. I framtidsvisjonen er det lagt inn at vi vil ha vekst i folketal, arbeidsplassar og bedrifter.



Figur 1: Netto flytting og migrasjon til Alver. Historiske tal, og framtidig behov dersom målet om 40 000 i 2040 skal nåast

I dei neste punkta er det framlegg til endringar under dei fire hovudmåla som blir vurdert. Dette er sett opp i ein tabell. Det er i hovudsak innspel frå styringsgruppemøta som er vurdert, i tillegg til at rådmannen også kjem med framlegg til nye endringar.

4. Innspel under hovudmål 1: Alver har attraktive senter og aktive lokalsamfunn

Dette vil vi oppnå (delmål)	Slik skal vi gjere det (vegval)	Framlegg til endring og vurdering
Alver har aktive lokalsamfunn med arbeidsplassar, lags- og kulturliv og busetting i heile kommunen.	Vi skal ha spreidd busetting	Innspel frå styringsgruppe: Vi skal ha spreidd busetting, og leggje til rette for bustadbygging utanfor definerte senter. Vurdering: Rådmannen støttar denne endringa.
Alver har aktive lokalsamfunn med arbeidsplassar, lags- og kulturliv og busetting i heile kommunen.	Vi skal gjere det lettare å byggje bustad nummer to eller tre på gardsbruk.	Framlegg endring frå rådmannen: Vi skal gjere det lettare å byggje bustad nummer to på gardsbruk. Vurdering: Vi bør presisere at vi ønskjer å gjere det lettare å byggje bustad nummer to på gardsbruk. Det er i dag få tilfelle kor det er behov for bustadhus nummer tre på ein gard. Ved å leggje inn strategi knytt til bustadhus nummer to, utfordrar ein gjeldande lovverk på området. I dei tilfelle det er ønskje om bustadhus nummer tre, må slike saker gå som dispensasjon. Endringa er fulgt opp i kap. 6, prinsipp for arealbruk, med ei presisering av kor tid det er aktuelt å opne opp for bustadhus nummer to. Nærare konkretisering skal følgjast

		opp i underliggende planar.
Alver har aktive lokalsamfunn med arbeidsplassar, lags- og kulturliv og busetting i heile kommunen.	Vi skal auke attraktiviteten ved å leggje betre til rette for fritidsbustader, båtplassar og naust.	Innspel frå styringsgruppe: Vil ha nytt mål: Vi skal leggje til rette for utvikling av bustader, fritidsbustader og naustbygging og ha differensiert strandsonepolitikk i Alver. Vurdering: Forvaltninga av strandsona er strengt regulert av nasjonale lover og føringar. I statleg planretningslinje for differensiert forvaltning av strandsona langs sjøen, er deler av Alver kommune (gamle Meland og Lindås kommune) i sone 2, områder der presset på areala er stort. Tidlegare Radøy kommune er i sone 3, områder med mindre press på areala. Denne todelinga har konsekvensar for korleis tiltak i dei ulike områda skal vurderast. Nærleik til sjø og sjøutsikt er ein kvalitet i Alver kommune, både i sentra våre og i meir perifere deler av kommunen. Deler av strandsona er ikkje tilgjengeleg på grunn av bratt terreng, men har ein verdi i form av utsikt til sjø. Med vår geografi er det naturleg og ønskeleg at det er rom for utvikling i strandsona. Ved vurdering av konkrete tiltak er det viktig at det ligg ein heilskapleg vurdering til grunn, og at omsynet til ålmenta sine interesser, fjernverknad av tiltak og samla verknad av alle enkelttiltak vert vurdert på ein god måte. For å sikre dette er eksisterande og ny kartlegging av funksjonell strandsone eit viktig premiss for vurderingane som skal gjerast i kommuneplanen sin arealdel. Rådmannen rår til å legge inn to nye strategiar/vegval knytt til dette delmålet. I Kap 6.2 er det også lagt inn eit eige avsnitt knytt til prinsipp for strandsoneforvaltning. Framlegg til formulering av nye vegval: · Vi skal sikre ålmenta sin tilgang til strandsona. · Vi skal gjennom arbeidet med kartlegging av funksjonell strandsone, vurdere areal for bustader, fritidsbustader, båtplassar og naust i strandsona.
Alver sikrar naturverdiar og naturmangfald, og tek vare på verdifulle kulturlandskap, kulturmiljø, landbruks- og friluftsområde	Vi skal ta vare på biologiske mangfald, og forvalte verdifulle område mot fysiske inngrep og utbygging.	Innspel frå styringsgruppe: Vi skal ta vare på biologisk mangfald, og <u>aktivt</u> forvalte verdifulle område. Vurdering: Rådmannen støttar å leggje inn «aktivt forvalte», men det er viktig å presisere at ein skal forvalte verdifulle område mot fysiske inngrep og utbygging. Rådmannen har tatt det med i høyringsutkastet.

5.Innspel under hovudmål 2: Alver har eit berekraftig næringsliv med Mongstad som landets fremste industriklynge

Dette vil vi oppnå (delmål)	Slik skal vi gjere det (vegval)	Framlegg til endring og vurdering
Mongstad og Fensfjorden er ei leiande nasjonal industriklynge for grøn industriutvikling.	Vi skal ha byggjeklart næringsareal med tilhøyrande infrastruktur	Innspel frå styringsgruppe: - Strategi om byggjeklart næringsareal bør ligge til generelt mål om mangfaldig og konkurransedyktig næringsliv. - Beskrive Fensfjord-området meir presist. Vurdering: Rådmannen vurderer at strategi om byggjeklart næringsareal bør vere knytt til Mongstad. Det er ein avgjerande faktor for å nå eit ambisiøst mål. Det betyr ikkje at kommunen kan ha klart areal andre stader, men det er spissa inn mot Mongstad-området. Rådmannen foreslår følgjande formulering om Fensfjorden i delmålet: Verksemdene på Mongstad og i Fensfjord-bassenget er ei leiande nasjonal industriklynge for grøn industriutvikling.
Arealintensiv næring ligg langs hovudvegnettet	Vi skal satse på fortetting og utvikling av eksisterande næringsområde med tilrettelagt infrastruktur.	Innspel frå styringsgruppe: Vil denne formuleringa av vegval avgrense framtidig utvikling av nye næringsområde? Vurdering: I kap 6, prinsipp for arealbruk, er det lagt inn følgjande formulering knytt til næringsområde: «Vi skal som <u>hovudprinsipp</u> vidareutvikle, fortette og bygge på eksisterande næringsområde, framfor å etablere nye næringsområde på ubebygd areal». Rådmannen meiner at dette gir eit handlingsrom til å opne for nye næringsområde i framtida om det skal vere behov for det.
Landbruksnæringa i Alver er aktiv og utviklingsorientert	Vi skal legge til rette for aktiv drift av eksisterande landbruksareal	Innspel frå styringsgruppe: Skogsbruksnæring i Alver er viktig, vi må presisere at vi vil utvikle denne næringa også. Vurdering: Rådmannen er samd at det er viktig å leggje til rette for skogbruket. Framlegg til nytt vegval: Vi skal leggje til rette for eit aktivt skogbruk.

6.Innspel under hovudmål 3: Alver har eit rikt og inkluderande kulturliv som er ei drivkraft i samfunnsutviklinga

Dette vil vi oppnå (delmål)	Slik skal vi gjere det (vegval)	Framlegg til endring og vurdering
Innbyggjarane i Alver skapar, opplever og deltek aktivt i lokale kultur- og idrettstilbod.	Vi skal ha organiserte tilbod og uorganiserte arenaer som seinkar terskelen	Innspel frå styringsgruppe Vurdere om, og eventuelt kor, vi skal ta med livssyn. Vurdering:

	for å delta innan kultur og idrett.	Kultur og frivilligheit omfattar all frivillig aktivitet, også aktivitet som er livssynsrelatert. Rådmannen meiner at dette er dekkja i dei formuleringar som ligg under hovudmål 3. Viss det er ønskje om å presisere mål og vegval rundt det å tru, så vil det truleg høyre til under hovudmål 4. Rådmannen foreslår også å justere tekst på vegval, slik at formuleringane blir betre. Framlegg til ny tekst: · Vi skal ha tilbod, aktivitetar og møteplassar som seinkar terskel for å delta innan kultur og idrett.
Innbyggjarane i Alver skapar, opplever og deltek aktivt i lokale kultur- og idrettstilbod.		Framlegg endring rådmannen: I sluttarbeidet med høyringsutkastet ser rådmannen at det er eit perspektiv som ikkje er tydeleg nok i planen. Det gjeld utviklinga av kulturarenaer og idrettsanlegg. Rådmannen foreslår nytt vegval under dette delmålet: · Vi skal sikre ei tilpassa og heilskapleg utvikling av kulturarenaer og idrettsanlegg
Kultur, kulturmiljø og kulturarv vert nytta som ein ressurs for berekraftig samfunnsutvikling.	Vi skal skape auka medvit om kulturminna våre gjennom formidling og aktiv bruk. Vi skal redusere klimagassutslepp ved å ta vare på, rehabilitere og finne ny bruk for eksisterande bygg. Vi skal vere ein aktiv og medviten nynorskkommune og jobbe målretta med skriftspråk, dialekt- og talemål.	Innspel frå styringsgruppe: Her var det fleire innspel til berekraftsbegrep og formulering på vegvala Vurdering: Rådmannen foreslår å omformulere to av dei strategiane som blei presentert på styringsgruppemøtet 27. oktober. Framlegg til nye formuleringar: · Vi skal vareta og byggje kunnskap om lokal tradisjonskultur · Vi skal ha ei berekraftig forvaltning av kultur, kulturmiljø og kulturarv

7. Innspel under hovudmål 4: Innbyggjarane i Alver har god livskvalitet, trygge oppvekstvilkår og god helse.

Dette vil vi oppnå (delmål)	Slik skal vi gjere det (vegval)	Framlegg til endring og vurdering
Innbyggjarane i Alver bur i trygge og gode bustader, tilpassa sin livssituasjon.	Vi skal leggje særleg til rette for innbyggjarar som ikkje bur trygt og godt.	Innspel frå styringsgruppe: Administrasjonen må kome med ny formulering – vise til at vi skal hjelpe innbyggjarane til å kunne hjelpe seg sjølv. Vurdering: Rådmannen foreslår ny formulering på delmålet: · Innbyggjarane i Alver bur i trygge og gode bustader.

Innbyggjarane i Alver får tenester tilpassar sine behov	Vi skal gje god service, ha ei open forvaltning og nytte kommunikasjonskanalar tilpassar ulike behov.	Rådmannen forslår ny formulering på vegval: Vi skal bidra til innbyggjarar med ulike behov og utfordringar får eit bustadtilbod. Innspel frå styringsgruppe: Det må kome tydeleg fram at vi skal vere tilgjengeleg for innbyggjarane våre. Det må vere lett å forstå det kommunen kommuniserer. Vurdering: Rådmannen foreslår følgjande formulering for å presisere at kommunen skal vere tilgjengeleg: Vi skal vere ein imøtekommande og open kommune, og leggje til rette for at alle innbyggjarar får god informasjon og rettleiing om kommunen sine tenester.
Innbyggjarane i Alver får tenester tilpassar sine behov	Vi skal ta i bruk fleire digitale verktøy som gjer at innbyggjarar, brukarar og kundar kan hjelpe seg sjølv.	Innspel frå styringsgruppe: Kan vi finne anna formulering for ...<i>kan hjelpe seg sjølv</i>? Vurdering: Rådmannen foreslår følgjande formulering: Vi skal ta i bruk fleire digitale sjølvhjelpsløysingar.

8. Innspel under kap 5.3: Slik skal vi jobbe for å måla

Dette vil vi oppnå (delmål)	Slik skal vi gjere det (vegval)	Framlegg til endring og vurdering
Alver kommune er ein attraktiv, trygg og utviklingsorientert organisasjon.	Vi skal leggje til rette for heile stillingar der det er mogleg.	Innspel frå styringsgruppe: Vi vil ha følgjande formulering: Vi skal ha ein heiltidskultur der heile og faste stillingar er hovudregelen/normalen Vurdering: Alver kommune har ein policy om å ha faste stillingar. Utfordringa er å etablere eit system som legger til rette for heile stillingar. Rådmannen har følgjande innspel til justering: Vi skal ha ein heiltidskultur, der hovudregelen er heile stillingar.

9. Prinsipp for arealbruk

I kap. 5 er det lagt inn fleire nye mål og vegval i høyringsdokumentet, og mange av desse påverkar korleis vi nyttar areala våre. Kap. 6 beskriv prinsipp for arealbruk og dette kapittelet er oppdatert i forhold til nye mål og vegval. Følgjande område er justert:

6.2 Samordna bustad-, areal- og transportplanlegging

Under hovudmål 1 er det laga ein strategi (vegval) med følgjande formulering: *Vi skal ha spreidd busetting, og*

leggje til rette for bustadbygging utanfor definerte senter. I kap 6.2, prinsipp for bustadutvikling, er det lagt inn følgjande framlegg til kvalitetskrav for spreidd busetting:

- Vi skal leggje til rette for ei bustadutvikling som støttar opp om bygdene
- Vi skal leggje til rette for at ny utvikling i hovudsak skal skje i tilknytning til eksisterande bygde areal, skular og barnehage.
- Vi skal sikre at utbygginga er lokalt tilpassa med omsyn til høgde og utnyttingsgrad
- Vi skal sikre at ny utbygging tar vare på kvalitetane i området
- Vi skal sikre at ny utbygging ikkje byggjer ned areal med aktivt landbruk og verdifulle kulturmiljø.
- Vi skal leggje til rette for at ein kan etablere bustadhus nummer to på gardsbruk som har eller planlegg for aktiv drift. Dette gjeld både når eksisterande hus ikkje er eigna som bustadhus (ikkje møter moderne krav) og ved generasjonsskifte.

Prinsipp for strandsoneforvaltning

Styringsgruppa har vore tydeleg på ein ønskjer å utfordre nasjonal strandsoneforvaltning, slik at det blir enklare å bygge bustader, fritidsbustader, naust og båtplassar i kystnære strom. Forvaltninga av strandsona er strengt regulert av nasjonale lover og føringar. I statleg planretningslinje for differensiert forvaltning av strandsona er Alver kommune plassert både i sone 2 og sone 3. Med Alver kommune sin geografi er det naturleg og ønskeleg at det er rom for utvikling i strandsona. Handlingsrommet for å få dette til, er å bruke kartlegging av funksjonell strandsona som grep til å planlegge tiltak i kystnære strom. Rådmannen rår til å leggje følgjande prinsipp for strandsoneforvaltning inn i kap 6.2:

Alver kommune har ei lang kystline, og store deler av kommunen har geografisk nærleik til sjø. For å nå måla skal vidare utvikling ta utgangspunkt i følgjande prinsipp:

- *Vi skal ha berekraftig arealbruk og forvaltning av kyst og sjø, og legge til rette for verdiskaping i sjøområda.*
- *Vi skal sikre ålmenta si tilgang til sjø ved tiltak i strandsona*
- *Vi skal legge kartlegging av den funksjonelle strandsona til grunn, ved planlegging av tiltak i sjønære område.*

6.3 Prinsipp for senterstruktur

I samband med mogleighetsstudien for lokal- og nærsenter, som vart avslutta vår 2021, kom det fram at Alver kommune bør vurdere senterstrukturen på nytt. Kommunen bør legge opp til ei tredeling av senterstrukturen (i tråd med regional plan for attraktive senter) og talet på nærsenter. Dagens senterstruktur er bygd på det som ligg i intensjonsavtalen for Alver kommune.

I arbeidet med samfunnsdelen er det starta eit analysearbeid for å vurdere senterstrukturen på nytt. Vurderinga er omtalt i vedlagt rapport, *Senterstruktur i Alver - siling og tilråding*. Tilrådinga er at det blir lagt inn ein ny tredelt senterstruktur for Alver, med tre nye nærsenter. Desse nærsentera er Myking, Alversund og Seim (Sjå kart lenger nede). I arbeidet med analyse, siling og tilråding er følgjande kriterier lagt til grunn for val av nye nærsenter:


1. Det må vere ein fysisk avgrensa stad, ei bygd med lokal historie, kultur og identitet. Mange funksjonar, spreidd over eit stort område, er ikkje eit senter.
2. Eit nærsenter bør innehalde viktige funksjonar innbyggjarane treng i kvardagen, td. barnehage, barneskule, daglegvare, møteplassar, samt tilbod innan kultur, idrett og friluftsliv.
3. Det må vere høgt nok folketal for å støtte opp om funksjonane.
4. Senterstrukturen bør sikre at flest mogleg av innbyggjarane får eit tilbod i nærleiken av der dei bur.
5. Nærsentera må ikkje ligge for nær kvarandre geografisk for å redusere konkurranse.
6. Talet på nye nærsenter må avgrensast; for mange senter vil gje færre tilbod på kvar stad og konkurranse om lokalisering av tenester og tilbod.

Intensjonen med å fastsette ein ny senterstruktur, med fleire nærsenter, er å få ein senterstruktur som er tilpassa busettingsmønsteret i kommunen, gjev flest mogleg av innbyggjarane i kommunen nærleik til eit senter, samstundes som det samla talet på senter ikkje vert for høgt. I arbeidet med den nye senterstrukturen har det vore mange spørsmål om kva den nye senterstrukturen vil bety, kva det vil bety å vere eit senter og kva

det vil bety å ikkje vere eit senter. Fastsetting av ein senterstruktur er kommunen si prioritering av kva stader vi skal satse på i utviklinga av kommunen.

Lokalisering av nye tenester skal bygge opp om definerte senter, dimensjonert etter senternivå. Den nye senterstrukturen, vil også vere eit styrke for omlandet til kvart enkelt senter, ved at ein større del av innbyggjarane vil kunne få dekkja sine daglege behov med kortare reiseavstand. Med den nye senterstrukturen bur 80 % av innbyggjarane i Alver innanfor ein 5 km radius til eit definert senter.

Bygder og bustadkonsentrasjonar som ikkje er del av senterstrukturen skal også sikrast ei utvikling, men i ein mindre skala. Ved utvikling av bygdene skal ein ta i bruk dei same prinsippa som for sentera, mellom anna med å legge til rette for utvikling i tilknytning til eksisterande utbygd areal og funksjonar som til dømes skule og barnehage.



Kart: framlegg til ny senterstruktur i Alver

Andre presiseringar knytt til sentera

Kvalitetar i sentera

Rådmannen foreslår følgjande tekst: Satsinga på å utvikle levande og attraktive sentera med varierte butilbod, gang- og sykkelsamband, møteplassar og kvalitet på lokale tilbod (handel, tenester og fritid), er ein styrke både for dei som bur i sentera og for innbyggjarane som bur utanfor, og som nyttar sentera til ulike tenester og tilbod.

Kompakt senterutvikling (Fortetting i eit Alver-perspektiv)

Følgjande presisering er lagt inn i teksten: Vi skal sikre at ny detaljhandel er lokalisert innanfor sentrumsavgrensinga.

Høyringsperiode

Det blir lagt opp til ein aktiv høyringsperiode der kommunen inviterer seg inn på etablerte arenaer i heile kommunen. Plan for høyringsperioden blir drøfta saman med formannskapet i møte 11. november. For å sikre ei brei og god deltaking blir det lagt opp til ein høyringsperiode fram til 1. februar 2022.

Grafisk utforming og presentasjon av samfunnsdelen

Administrasjonen vil jobbe vidare med det grafiske uttrykket til planen etter høyringsperioden. Vi vil lage ei brosjyre, som det er lett å ta med seg og kjekt bla i – i tillegg til at planen blir tilgjengeleg i det digitale plan-verktøyet, Framsikt.

Tilråding

Rådmannen rår til at høyringsutkast for kommuneplanen sin samfunnsdel blir lagt ut på høyring og offentleg ettersyn. Høyringsfrist er sett til 1. februar 2022.

Vedlegg i saken:

04.11.2021	1 Kommuneplanen sin samfunnsdel 2022-2034_høringsutkast	1636739
04.11.2021	2 Planprogram for kommuneplanen sin samfunnsdel Alver kommune	1636740
04.11.2021	3 Senterstruktur i Alver_Siling og tilråding_vedlegg til politisk sak	1636741
04.11.2021	4 Krf - Ap - Sp - H sitt framlegg til styringsgruppemøte 29-09-21	1636742
04.11.2021	5 MDG - Raudt - V - SV sitt framlegg til styringsgruppemøte 29-09-21	1636743
04.11.2021	6 Referat_styringsgruppemøte 27. okt 2021	1636744
04.11.2021	7 Rapport 1_Melding frå folket_Innspel til samfunnsdelen_11-03-21	1636745
04.11.2021	8 Rapport 2_Nærsenterrapport_Innspel til samfunnsdelen_11-03-21	1636746
04.11.2021	9 Rapport 3_Samtale med råda_Innspel til samfunnsdelen_11-03-21	1636747
04.11.2021	10 Rapport 4_Mitt Alver_Innspel til samfunnsdelen_11-03-21	1636748
04.11.2021	11 Rapport 5_Digital samfunnsdialog_Innspel til samfunnsdelen_11-03-21	1636749
04.11.2021	12 Rapport 6_Melding frå administrasjonen_Innspel til samfunnsdelen_11-03-21	1636750
04.11.2021	13 Rapport 7_Tenketank med næringslivet_21	1636751

Arkiv: <arkivID><jplD> FA-A10, FE-223, TI-&00
JournalpostID:
Sakshandsamar:
Dato: 01.11.2021

Saksframlegg

Saksnr.	Utval	Møtedato
068/21	Utval for oppvekst, kunnskap og kultur	09.11.2021
097/21	Alver formannskap	11.11.2021
	Alver kommunestyre	

Retningslinjer for tildeling av tilskot til private barnehagar

Rådmannen sitt framlegg til vedtak:

Alver kommune følger Forskrift om tildeling av tilskudd til private barnehager ved tildeling av tilskot til private barnehagar.

Politisk handsaming

Saka skal til innstilling i utval for oppvekst, kunnskap og kultur og formannskap.

Saka skal avgjerast i kommunestyret.

Bakgrunn

I kommunestyret 24.06.2021 sak 80/21 gjorde rådmannen framlegg om å innføre tre teljetidspunkt i kommunale- og private barnehagar.

I same sak stod dette, sitat:

Administrasjonen set i verk arbeidet med å lage retningsline for berekning av tilskot til dei private barnehagane samt justere retningsline for gjennomføring av opptak til barnehage. Framlegg til retningsliner kjem opp som eiga sak i september.

Vedtak i kommunestyret 24.06.2021:

KO- 080/21 Vedtak: *Kommunestyre ynskjer at barnehagane i Alver skal vera trygge og gode vere- og læreplassar for barna våre. Føreseielege rammer for barn, tilsette og barnehageeigar bidreg til dette. Fleire ein eitt teljetidspunkt (15.12.) vil skapa ein ustabilitet i barnehagetilbodet gjennom året, både når det gjeld gruppesamansetjing, personale og økonomi. I barnehagen der trygge relasjonar er så avgjerande for kvaliteten, vil dette vera svært uheldig. Fleire teljetidspunkt vil gje auka bruk av korte midlertidige stillingar, noko som er dårleg personalpolitikk.*

1. Alver Kommune vil halda på eitt teljetidspunkt i kommunale og private barnehagar, 15/12.

På bakgrunn av dette vedtaket har Alver kommune eitt teljetidspunkt, 15.12. Det er såleis ikkje behov for å utarbeide lokale retningslinjer for tildeling av tilskot til private barnehagar. Alver kommunen følger den statlege forskrifta om tildeling av tilskot til private barnehagar.

Retningslinjer for opptak til barnehagar i Alver kommune kjem opp som eiga sak.

Saksopplysninger:

I forskrift om tildeling av tilskot til private barnehagar kjem det tydeleg fram korleis denne prosessen skal vere.

§ 1 i forskrifta, sitat:

§ 1.Vedtak om kommunalt tilskudd

Kommunen skal uten ugrunnet opphold fatte vedtak om tilskudd til private barnehager én gang i året, i samsvar med forskriften her.

Kommunen skal uten ugrunnet opphold fatte nytt vedtak om tilskudd til private barnehager hvis det følger av lokale retningslinjer eller det foreligger store aktivitetsendringer etter [§ 12](#).

I praksis betyr dette at dei private barnehagane får vedtak om **ny sats** for 2022 innan 31.10.2021. Tilskotet byggjer på tal frå Basilrapportering per 15.12. Snarast mogeleg etter at Basilrapporteringa er godkjent, vert det skrive vedtak om tilskot for 2022.

Store aktivitetsendringar krev nytt vedtak om tilskot. I samtale med Statsforvaltaren kan døme på stor aktivitetsendring vere ein avdeling opp eller ned. I samband med retningslinjer for opptak vil rådmannen lage rutinar for å vurdere store aktivitetsendringar.

§ 3 i forskrifta, sitat:

§ 3.Driftstilskudd til ordinære barnehager

Kommunen skal gi driftstilskudd til private ordinære barnehager per heltidsplass. Driftstilskuddet skal beregnes ut fra gjennomsnittlige ordinære driftsutgifter per heltidsplass i tilsvarende kommunale ordinære barnehager, fratrukket administrasjonsutgifter, pensjonsutgifter og arbeidsgiveravgift på pensjonsutgifter. Grunnlaget for beregningen er kommuneregnskapet fra to år før tilskuddsåret.

Kommunen skal gi påslag for pensjons- og administrasjonsutgifter, jf. § 4 og § 5.

Arbeidet med driftstilskot til dei private barnehagane vert gjort i samband med budsjettprosessen kvar haust. Som det kjem fram i lovteksten er kostnader i dei kommunale barnehagane styrande for dette tilskotet.

§ 6 i forskrifta, sitat:

§ 6.Kapitaltilskudd til ordinære barnehager

Kommunen skal gi kapitaltilskudd til private ordinære barnehager per heltidsplass ut fra barnehagebyggets byggeår.

Tilskuddet skal beregnes etter satser fastsatt av departementet.

Kapitaltilskotet, vert saman med driftstilskotet, betalt ut til dei private barnehagane månadleg.

Lenke til: [Forskrift om tildeling av tilskudd til private barnehager](#)

Kort oppsummert er innhaldet i forskrifta om tildeling av tilskot til private barnehagar dette:

- Kommunalt tilskot til private barnehagar
- Driftstilskot til ordinære barnehagar
- Kapitaltilskot til ordinære barnehagar
- Berekning av sats tilskot private barnehagar

Teljing per 15.12.

- Store aktivitetssendringar i private barnehagar

Vurdere tilskotet på nytt

- Rapportering

Som allereie sagt følgjer Alver kommune *Forskrift om tildeling av tilskudd til private barnehager* ved tildeling av tilskot til dei private barnehagane. I praksis betyr det å etterleve krava i lov og forskrift. Mykje er styrt av fastsette tidspunkt. Døme på dette er kravet til vedtak om sats innan 31.10., og Basirapportering per 15.12. kvart år.

Framlegg til rådmannen sitt vedtak er såleis ei stadfesting av regelverket for tildeling av tilskot til private barnehagar. Dette er styrande for korleis tildeling av tilskot til private barnehagar i Alver vert gjort.

Arkiv: <arkivID><jplD> FA-H00
JournalpostID:
Sakshandsamar:
Dato: 25.10.2021

Saksframlegg

Saksnr.	Utval	Møtedato
046/21	Råd for menneske med nedsett funksjonsevne	08.11.2021
033/21	Utval for helse og omsorg	09.11.2021
098/21	Alver formannskap	11.11.2021
	Alver kommunestyre	

Avvikle interkommunalt samarbeid ved Radøy interkommunale busenter

- A. **Rådmannen sitt framlegg til vedtak:**
Interkommunalt samarbeid ved Radøy interkommunale busenter vert avvikla og avtalen vert sagt opp innan 31.12.21
- B. Organisering av noverande institusjonstilbod til personar busett i Alver vert avvikla og nytt butilbod vert endra til heildøgnsbemanna omsorgsbustad pluss (bufellesskap) når ny lokasjon er klar. I oppseiingstida vert det arbeidd med å etablere lokasjon for framtidig drift.
- C. Rådmannen vil komme attende til kommunestyret med sak om val av lokasjon

Politisk handsaming

Saka skal til uttale i råd for menneske med nedsett funksjonsevne

Saka skal til innstilling i utval for helse og omsorg og formannskap

Saka skal avgjerast i kommunestyret

Bakgrunn

Viser til sak KO-054/21 der det vart vedtatt å starte opp eit 4-årig administrativt prosjekt for leiing, kvalitetsforbetring og ressurseffektiv drift i sektor Helse- og omsorg. Bakgrunnen for prosjektet er vedtatt innsparingar i økonomiplan 2021- 2024. Prosjektet tek utgangspunkt i PwC sin rapport *Kartlegging av helse og omsorg i Alver kommune*, datert 11.01.2021. Framlegg til tiltak i prosjektet som er av prinsipiell karakter og treng strategiske avklaringar, vert lagt fram i eigne politiske saker. Tiltak skildra i rapport som å avvikle Radøy interkommunale busenter vert teken til handsaming i politisk sak.

Rapporten frå PwC seier mellom anna:

«Omtrent en sjettedel av den voksne befolkningen har til enhver tid et psykisk helseproblem og/eller rusproblem, og det er en forventning om at dette vil øke framover. De vanligste lidelsene er angst og depresjon. Redusert livskvalitet, økt dødelighet, sykefravær og uførepensjon er blant de viktigste følgene av psykiske helse- og rusmiddelproblemer. Oppgavene til kommunen overfor disse brukergruppene omfatter kompetansehevende tiltak, nettverksbygging, tilskuddsordninger, kartlegginger og tilsyn. Psykisk helsearbeid og rusforebyggende arbeid er fortsatt et nasjonalt satsingsområde, og det er en forventning at kommuner kontinuerlig videreutvikler og bedrer tjenestetilbudet innen psykisk helse- og rusforebygging». (s.23)

Alver kommune har i dag følgjande butilbod med personalbase innan området psykisk helse og rus:

Enhet	Antall plasser
Røsvikdalen	6
Skrenten	2

Krossleitet	10
Radøy interkommunale busenter	9
Storbruhaugen	2
Sum Psykisk helse- og rus	29

PwC skriv følgande (s, 94):

Vurdering salg av plasser:

Kommunen selger også plasser. Dette gjelder 5 plasser i institusjonen Radøy interkommunale busenter (RIB) på Manger. Busenteret er et interkommunalt samarbeid som ble etablert i 2008. Vik kommune og Bergen kommune deltar i samarbeidet og har en plass hver. I tillegg selges det to plasser til to kommuner som ikke deltar i det interkommunale samarbeidet. Alver disponerer for tiden 4 av de 9 plassene i busenteret til sine egne brukere, hvorav en plass står ledig. Institusjonen holder til i en fløy i gamle Radøy sjukeheim, Alver kommune eier bygget. Samarbeidet er avtaleregulert, og kostnadene til drift for hver bruker refunderes helt og holdent av brukerens hjemkommune. Alver har ansvar for ledelse og administrasjon og forsvarlig drift og bemanning. Det er 8 medarbeidere som går i døgnturnus, og totalt 13,9 årsverk fast bemanning.

I lys av den krevende situasjonen Alver står overfor når det gjelder antall lokasjoner og tilhørende bemanningsbehov, så vil det være naturlig å også vurdere å avvikle det interkommunale samarbeidet på RIB. Kostnadsbesparelsen vil være at de brukerne som tilhører Alver kan samlokaliseres med andre brukere i kommunen. En gevinst vil også være at personell og kompetanse som idag brukes på RIB kan nyttes i andre deler av tjenestene. Oppsigelsestid i vertskommuneavtalen er 12 måneder. En eventuell avvikling må skje over tid og i dialog og samarbeid med de kommunene som inngår i avtalen.

Tiltak	Innsparings-Potensial MNOK	Oppstart	Effekt	Konsekvens
Avvikling av Radøy interkommunale busenter Prosjekt for planlegging og gjennomføring	Beregnet inn i generell samlokalisering	2022	Bedre utnyttelse av personell	Samarbeidskommunene må ta hjem sine brukere

Saksopplysninger:

Historikk:

Kommunestyre i Radøy kommune vedtok 19.9.2007 i sak 039/07 oppstart av arbeid med bu- tilbud v/ RIB jamfør vedlegg 1. Bakgrunn for arbeidet var at Helse Bergen sin døgnavdeling på Manger skulle avviklast og ni pasientar var utskrivingsklare. Dette betydde at kommunane skulle ta over ansvaret for pasientane. Radøy kommune hadde den gang 3 utskrivingsklare pasientar. Helse Bergen tok initiativ til å opprette eit prosjekt der hovudmandatet var å greie ut- og gjere framlegg om eit døgnbemanna busenter, organisert som eit interkommunalt samarbeidsprosjekt for psykiatriske pasientar i Nordhordland.

Prosjektgruppa var breidt samansett både frå brukarorganisasjonar, Helse Bergen og Nordhordlands kommunane.

Målgruppa for butilbodet var klart definert- «*Psykiatriske pasientar som treng døgntilgjengeleg oppfølging og omsorg i institusjonslikande rammer*». Rådmannen si vurdering i 2007 var at Radøy kommune var den av Nordhordlands kommunane som hadde flest pasientar i målgruppa. Kostandane ved å legge til rette for eit eige butilbod for Radøy sine pasientar ville bli mykje høgare enn ved å gå inn i eit interkommunalt samarbeid.

Drift ved RIB starta 1. oktober 2008 med 9 plassar. Radøy, Vik, Bergen og Osterøy kommune starta opp interkommunalt samarbeid. I 2016 gjekk Osterøy ut av det interkommunale samarbeidet- og oppretta eige butilbod i Osterøy. I tida har fleire eksterne kommunar kjøpt plass til brukarar ved RIB.

Avtale om plasser pr. no:

- Alver kommune 4 plassar
- Vik kommune 1 plass
- Bergen kommune 1 plass
- Sal av 2 plassar til eksterne kommunar
- 1 plass ledig

Status

Pr. 1. oktober 2021 blir 7 av 9 plassar nytta ved busenteret. 3 blir nytta av Alver kommune, 1 Bergen kommune, 1 Vik kommune og 2 plassar blir kjøpt av andre kommunar som ikkje er med i det interkommunale samarbeidet. Personalet v/ RIB gir og tenester til omsorgsbustad pluss som er nærliggande RIB (brukar som tilhøyrar Alver kommune). Andre ledige plassar er pr. tida ikkje nytta med bakgrunn i at personar som er i behov for døgnbemanna butilbod i Alver kommune ikkje fyller kriteria for plass ved institusjonen (sjå vedlegg 2, Avtalens punkt 1).

Den interkommunale avtalen for RIB jamfør vedlegg 2, har ei oppseiingstid på 12 månadar. Kommunar som ikkje er med i det interkommunale samarbeidet, men som kjøper plass har individuelle avtalar. Ingen av noverande avtalar går lenger enn ut desember 2022.

Dei seinare år har dei fleste kommunar bygd opp tenester med heildøgnsstilbod til brukargruppa. Dei fleste kommunar har valt å organisere tilbodet i omsorgsbustad pluss (bufellesskap). Ved opphald i institusjon krev kommunen vederlagsbetaling frå den enkelte bebuar som har vedtak på langtidsopphald. Vederlagsbetaling er heimla i [Forskrift om egenandel for kommunale helse- og omsorgstjenester - Lovdata](#). Eigenandelen skal omfatte kost, losji, medisinar mv. samt helse- og omsorgstenester som kommunen organiserer etter helse- og omsorgstenestelova.

Ved drift som omsorgsbustad pluss (bufellesskap) er det den einskilde brukar som sjølv må dekke kost, losji, medisinar mv. Brukar kan søkje bustønad frå Husbanken.

Samanlikna med etablerte bufellesskap i Alver kommune vil ikkje brukar få høgare kostnader ved omsorgsbustad pluss (bufellesskap) enn ved å bu i institusjon.

Omsorgsbustad pluss (bufellesskap) i Alver kommune har institusjonslikande rammer med tanke på bemanning gjennom døgnet. Brukarane har si eiga leilegheit med kjøkken, bad, soverom, stove, terrasse og eigen inngang som dei rår over. Brukarane kan nytte seg av fellesrom/ stover til sosiale samankomstar og felles måltid om ein ynskjer det. Brukarane blir etter kartlegging gitt individuelle vedtak etter behov. Det er ein nødvendigeheit og trygghet for målgruppa å ha tilgang på personale gjennom døgnet.

Lovverket opnar for at ein kan endra vedtak om langtidsplass i institusjon til anna heildøgnsbemanna bustad.

Vurdering

Lokala som i dag blir disponert til RIB er i behov for rehabilitering på fleire områder. Bygget er frå 1985 og det er i liten grad gjort rehabilitering av større overflater sidan bygget var nytt. Dersom RIB skal fortsette drift i lokala må ein sikre at lokasjonen får rehabilitering etter dagens krav. Nye bad på alle bebuarrom, nytt produksjonskjøkken, nye golv i heile avdelinga, ny ventilasjon, nye dører både inne og ute.

Ved avvikling av RIB må ein sikre dei 3 brukarane som tilhøyrar Alver kommune eit likeverdig tilbod. Pr. tida har ikkje Alver kommune ledig kapasitet i nokre av dei etablerte bufellesskap til målgruppa. Alver kommune kan vurdere sal av plass til andre kommunar om ein har ledig kapasitet.

Dersom kommunestyret godkjenner avvikling av drift ved RIB vil ein kunne starte planleggingsprosess med val av ny lokasjon.

10. juni 2021 var det dialogmøte med samarbeidskommunane i det interkommunale samarbeidet. Bergen, Vik og Alver kommune gjennomførte møtet på Radøy interkommunale busenter. Avtalen baserer seg på at det er 12 månader oppseiing på avtalen frå partane. Bergen kommune formidla at det er viktig at dei får tilbakemelding så snart saka er handsama politisk i Alver kommune, slik at dei får tid til å etablere nytt tilbod i Bergen. Vik formidla at dei ynskjer å gå i dialog med Alver kommune om kjøp av tenester vidare dersom det interkommunale samarbeidet blir sagt opp.

Verneombod, plasstillitsvalt vart informert om den politiske saka hhv. i møte 14. oktober og 20. oktober 2021. Brukarar og/ eller pårørande blir orientert om rådmannen sitt framlegg til vedtak.

Rådmann vurderer at utviklinga av behov og etterspørsel for heildøgns bemanna butilbod til målgruppa er i endring. Ein kommune med innbyggartal som Alver treng heildøgns bemanna plassar i bufellesskap til eige bruk i større grad enn tidlegare. Uavhengig av det må ein gjere vurderingar og ta omsyn til samansetting av grupper ved innflytting i bufellesskap.

Avvikling av interkommunalt drift vil ikkje gje brukaren eit dårlegare tilbod, men brukaren må flytte til nytt bomiljø og få oppfølging frå fastlege på line med andre innbyggjarar i kommunen.

Vedlegg i saken:

01.11.2021	Sakspapir KO Radøy 2007	1634054
01.11.2021	Avtale RIB, Bergen	1634056
01.11.2021	Avtale RIB, Vik	1634055

Arkiv: <arkivID><jplID> FA-M41
JournalpostID:
Sakshandsamar:
Dato: 04.11.2021

Saksframlegg

Saksnr.	Utval	Møtedato
128/21	Utval for næringsutvikling og drift	10.11.2021
099/21	Alver formannskap	11.11.2021
	Alver kommunestyre	

KNARA – Hovudreinseanlegg Knarvik - Supplerande vurderingar

Rådmannen sitt framlegg til vedtak:

Kommunestyret vedtek plassering av nytt hovudreinseanlegg ved Øvre Kvassneset i Knarvik.

Politisk handsaming

Saka skal til uttale i utval for næringsutvikling og drift

Saka skal til innstilling i formannskapet

Saka skal avgjerast i kommunestyret

SAKSUTGREIING

Bakgrunn

Saka om plassering av nytt hovudreinseanlegg for Knarvikområdet har ei lang forhistorie og var sist handsama i sak 064/21 i Formannskapet 10.06.2021.

Utgreiinga *Alternativsvurdering lokalisering for Hovedreinsanlegg Knarvik (KNARA)* datert 03.06.2021, vart handsama i Utval for næringsutvikling og drift 09.06.2021 og i Alver formannskap 10.06.2021. Alver formannskap fatta samrøystes følgande vedtak:

Formannskapet tek ikkje stilling til lokalitet for Hovudreinseanlegg i Alver kommune no. Formannskapet ber om at det i saka blir belyst lokaliteter og kostnad med fleire mindre anlegg. Formannskapet ber om at det vert utgreia fleire lokaliteter for reinseanlegg utanfor Knarvik. På bakgrunn av desse punkta utsett formannskapet saka og ber rådmannen kome attende med oppdatert saksutgreiing.

Med dette som grunnlag har Rådmannen utarbeidd supplerande vurderingar i rapport som vedlegg i denne saka. Denne rapporten gjennomgår og vurderer forhold som vert peika på i vedtaket frå formannskapet:

- Utgreie lokalitetar og kostnader med fleire mindre anlegg
- Utgreie fleire lokalitetar for reinseanlegg utanfor Knarvik

I alternativsvurderinga for lokalisering (2021.06.03) er det gjort ein grovsiling av 7 lokalitetar innanfor eller nær tettbebyggelsen, frå Gangstø (Hilland) i nordvest til Knarvik i sør og Gjervik i aust.

Følgande kriteria vart lagt til grunn for grovsilinga:

- 1) Utsleppsstad / resipienttilhøve
- 2) Gjeldande planar og planar i arbeid
- 3) Nærheit til knutepunkt og hovudleidningar (konsekvensar for leidningsanlegg)
- 4) Tidsaspekt (mogleg framdrift)

Etter grovsilinga stod ein igjen med to aktuelle lokalitetar:

- Hagelsundet, sør for brufestet (daganlegg, med tilførselstunnel frå Kvassneset)
- Kvassneset (daganlegg)

Desse vart vurdert vidare for følgjande kriterier:

- Gjeldande planar og planar i arbeid
- Anleggsgjennomføring
- Tilkomst og tomtetilhøve
- Nærmiljø og friluftsliv
- Investeringsbehov og drift
- Tidsaspekt / framdrift

Lokaliseringsrapporten frå juni 2021 gjer ingen konkret tilråding om val av alternativ, men Kvassneset framstod etter ei samla vurdering som den beste lokaliseringa.

Tilleggsvurderingane i høve til vedtak i formannskapet 10.06.2021 går fram av utgreiinga som er lagt ved denne saka. Det er halde møter med Statsforvalteren si miljøvernavdeling som er utsleppsmynde i saka. Ved søknad om utsleppsløyve vert det krevd oppdatert dokumentasjon av resipienttilhøva. Nye resipientundersøkingar vil verte utført i 2022. Det er venta at unntak frå sekundærrensekravet kan verte gitt for Osterfjorden med løyve til primærrensing, men ikkje for Radfjorden/Kvernafjorden. Det er også avklart at det kan tillatast primærrensing sjølv om det kan verte sett krav om sekundærrensing til annan resipient innan same tettbebyggelse.

I alt 11 lokalitetar innanfor tettbebyggelsen er i utgangspunktet vurdert. Av desse er følgjande 5 lokaliseringar vald for vidare vurderingar på bakgrunn av planstatus for området, mogleg framdrift, samt tilkomst og tomtetilhøve:

- Øvre Kvassneset.

Daganlegg på ledig kommunal tomt på næringsområde ved BKK.

- Nedre Kvassneset

Daganlegg ved sjø nedanfor Kvassnesvegen dels på opphavleg avsett tomt, dels på friområde.

- Hagelsundet

Daganlegg ved sjø sør for austre brufeste.

- Galteråsen

Fjellanlegg ovanfor bebyggelsen på Ikenberget

- Gangstø

Fjellanlegg nord for Hillandsvatnet

Dei nemnte 5 lokalitetane er kostnadsrekna kvar for seg som hovudanlegg for heile tettbebyggelsen.

Det er også sett på ei løysning der Gangstø og Galteråsen samlast til eitt felles reinseanlegg for 5.000 pe med utslepp til høvesvis Radfjorden og Kvernafjorden avhengig av kva for lokasjon som vert valt. Det andre anlegget for 10.000 pe frå Knarvik og Isdalstø kan enten leggst til Hagelsundet eller på ein av dei to lokalitetane på Kvassneset.

Det er sett opp tabellar for lokasjonar med eit felles anlegg samt kombinasjonar med to anlegg, det er nytta ein fageskala for dei ulike kriteriane.

Grønn	God
Gul	Middels
Rød	Dårlig

Lokalitet, 1 felles anlegg for tettbebyggelsen	Type anlegg	Resipient	Kostnader		Nærhet til hoved-anlegg VA	Plan-grunnlag	Fremdrift
			Invest.	Drift			
Hagelsundet	Dag	Osterfjorden	391 mill.				
Øvre Kvassneset.	Dag	Osterfjorden	245 mill.				
Nedre Kvassneset.	Dag	Osterfjorden	293 mill.				
Galteråsen (Ikenberget)	Fjell	Kverna-fjorden	482 mill.				
Gangstø	Fjell	Rad-fjorden	460 mill.				

Figur 1 Eit felles anlegg for tettbebyggelsen

Lokalitet, 2 anlegg for tettbebyggelsen	Type anlegg	Resipient	Kostnader		Nærhet til hoved-anlegg	Plan-grunnlag	Fremdrift
			Invest.	Drift			
Galteråsen + Hagelsundet	Fjell + Dag	Oster- og Kverna-fjorden	589 mill.				
Gangstø + Hagelsundet	Fjell + Dag	Oster- og Rad-fjorden	570 mill.				
Galteråsen + Øvre Kvassneset	Fjell + Dag	Oster- og Kverna-fjorden	441 mill.				
Gangstø + Øvre Kvassneset	Fjell + Dag	Oster- og Rad-fjorden	422 mill.				
Galteråsen + Nedre Kvassneset	Fjell + Dag	Oster- og Kverna-fjorden	514 mill.				
Gangstø + Nedre Kvassneset	Fjell + Dag	Oster- og Rad-fjorden	495 mill.				

Figur 2 To anlegg for tettbebyggelsen

Vurderingar

Vurderingane av lokalitetane her er basert på tekniske og økonomiske tilhøve.

Vurderingane av dei ulike lokalitetane viser stor spennvidde i kostnader og gebyrkonsekvensar. Det er også store skilnadar på tekniske løysningar og kompleksitet i høve til utbygging og drift. Dagens moderne avløpsreinseanlegg har svært strenge krav til luktreinsing. Det vil også være lite tungtrafikk til og frå anlegget, avgrensa til henting av tildekkte slamcontainerar annan kvar veke og eventuell levering av kjemikaliar eit par gonger i året.

Statsforvaltaren er tydeleg på at eit stort reinseanlegg normalt er det mest berekraftige framfor to eller fleire mindre anlegg.

Dei to gunstigaste alternativa til lokalisering av reinseanlegg er på Kvassneset. Fordelen med ei løysing på Kvassneset er at reinseanlegget vert plassert der hovudslepp frå Knarvik tettstad i dag ligg, samt nært andre utslepp frå Knarvik. Dette fører til lågare investering og driftsmessig fordelar ved bygging av overføringsanlegg. Resipient er Osterfjorden som har dokumentert betre vasskavlitet enn Radfjorden og Kvernafjorden.

For Øvre Kvassneset er anlegget foreslått plassert på kommunal tomt ovanfor Kvassnesvegen, avsett til offentlig eller privat tenesteyting. Tomten ligg tilgjengeleg og delvis planert i flatt terreng på næringsområde med BKK som næraste nabo. Lokaliseringa er godt tilrettelagt for å samle heile tettbebyggelsen hit. Øvre Kvassneset er det klart rimelegaste alternativet. .

Nedre Kvassneset er som eit alternativ plassbesparande løysing på område som i KDP er satt av med formål *Andre typar bebyggelse og anlegg*, er det vurdert å legge tilkomstveg frå det øvre område i skjæring under Kvassnesvegen. Ein vil då koma inn på delar av friområdet, men i mindre grad enn for dei to alternativa som i førebels prosjekt frå 2020 vart vurdert nedanfor vegen, men elveløpet frå Kvassnesstemma må leggjast noko om lengre mot aust. Over skjæringa for tilkomstvegen kan det byggast eit «lokk» på det djupaste partiet slik at terrenget kan førast tilbake. Kostnadane vil verta høgare enn for øvre Kvassneset, men vil likevel vera lågare enn dei andre alternativa. Ein drift- og etableringsmessig fordel med denne løysinga er at ein ikkje treng bygga ein eigen pumpestasjon for pumping inn på reinseanlegget.

Etter ei totalvurdering basert på teknisk økonomiske tilhøve av alternativa som er utgreidd, tilrår rådmannen å byggje eitt reinseanlegg for heile tettbebyggelsen på Øvre Kvassneset. Hovudskilnaden på alternativ øvre og nedre Kvassneset er tilkomsten. For Øvre Kvassneset er det allereie tilkomst til den kommunale tomta medan for Nedre Kvassneset må det etablerast veg i bratt terreng.

Dette vil gje den klart rimelegaste løysninga med ein kostnad som ligg i storleik 150 mill. kr lågare enn neste alternativ, og med utslepp til den best tilgjengelege og tilrådde resipienten for tettbebyggelsen.

I gebyrberekningane som er utført i samband med saka, er det forutsett at investeringane skjer i perioden 2025 – 2027. Utbyggingskostnadane fordelt på dagens 7.250 abonnentar i Alver kommune varierer frå 33.800 kr pr. abonnent for øvre Kvassneset til 66.500 kr for Galteråsen.

Det hastar å få ei avgjerd i saka, mellom anna fordi avløpet frå store deler av Knarvik tettstad i dag går ureinsa til utslepp i sjø. Ei utsetjing vil i yste konsekvens kunne hindre vidare utbygging i Knarvikområdet då det ikkje er tilstrekkeleg kapasitet for reinsing av avløp.

Nye resipientundersøkingar vil verte utført i 2022, og det vil være ein stor fordel om vedtak om lokalitet kan takast med det første, slik at vidare planlegging og regulering kan komme i gang samstundes.»

Vedlegg i saken:

04.11.2021 KNARA _ Lokalisering_Supplerende vurderinger_

1636804

Arkiv: <arkivID><jplD> FA-M16, TI-&40
JournalpostID:
Sakshandsamar:
Dato: 04.11.2021

Saksframlegg

Saksnr.	Utval	Møtedato
100/21	Alver formannskap	11.11.2021
	Alver kommunestyre	

Tilleggsfinansiering prosjekt 34001 Nytt vassbehandlingsanlegg Hestdal

Rådmannen sitt framlegg til vedtak:

«Kommunestyret godkjenner ein auke i prosjektet "34001 Nytt vassbehandlingsanlegg på Hestdal" på 4 900 000 kr. Totalramma for prosjektet vert auka frå 85,4 mill til 90, 3 mill.

Kommunestyret godkjenner nytt budsjett for 2021 fordelt slik:

Vatn: 3 000 000 kr

Avlaup: 1 900 000 kr.

Totalramma for vatn 2021 auker frå 29,7 mill til 32,7 mill

Totalramma for avløp 2021 auker frå 2, 64 mill til 4,54 mill

Auken i prosjektkostnad i 2021 på kr 4 900 000 vert finansiert av auke i bruk av tidligare ubrukte lånemidler.

Politisk handsaming


Saka skal til innstilling i formannskapet

Saka skal avgjerast i kommunestyret

Bakgrunn

Bakgrunn

Nytt hovudvassverk på Hestdal i tidlegare Meland kommune skal erstatte eksisterande vassverk som ikkje produserar nok vatn eller oppfyllar alle krav til reinsing i drikkevassforskrifta. Bygging av det nye vassverket er på det næraste ferdigstilt. Prøvedrifta er i gang og vil pågå eitt år fram i tid. Det gjenstår noko arbeid knytt til utslepp og reinsing av avløp frå vannbehandlingsanlegget. Heile anlegget inkludert veg mellom Hestdal VBA og Myrvollane mot Grasdal ungdomshus vert avslutta på nyåret '22.



Raud ring viser lokalisering av nytt vassbehandlingsanlegg på Hestdal

Prosjekt 34001 Nytt vassbehandlingsanlegg har eit totalt prosjektbudsjett på 85,4 mill kr eks mva. Prosjektet starta opp i tidlegare Meland kommune og ca. 20 mill kr av projektkostnaden var påløpt før overgangen til Alver kommune.

Bygging av det nye vassbehandlingsanlegget er eit komplisert prosjekt som omfattar mange aktørar, entrepriser og grensesnitt. Det har vist seg at budsjettet i utgangspunktet ikkje tok tilstrekkeleg høgde for kompleksiteten og usikkerheita i prosjektet, og at kombinasjonen av dette saman med nokre uforutsette hendingar har ført til at prosjektbudsjettet ikkje held.

I mars 2021 la administrasjonen fram eiga sak om auka kostnader på 9,4 millionar basert på det ein då kjente av gjenståande arbeid og usikkerheit. Vedtaket i saka gav prosjektet den gjeldande ramma på 85,4 mill.

Pr oktober 2021 har prosjektet gjenståande totalt 3,6 mill av denne ramma. Entreprenør har frist på seg til primo november for sluttoppstilling av projektkostnader. Den førebelse oversikta til administrasjonen viser at prosjektet totalt skal dekke kostnader på 7,7 millionar for det gjenståande arbeidet. Dette viser at prosjektet vil krevje ei rammeauke på 4,9 millionar inkl 20% usikkerhet for å fullføre arbeidet som gjenstår.

Gjennom tertialrapporteringa i september vart det meldt om eit behov på 8,6 mill for det gjenståande arbeidet i prosjektet «Nytt vassbehandlingsanlegg Hestdal». Dette behovet reflekterer de me kjente til i august. Det var då ikkje tatt høgde for midlane som vart godkjent på avløpsdelen, prosjektnummer 35014, på 2,64 mill i mars.

Det er ingen nye usikkerheitspostar som bidreg til auken i projektkostnader, men ei generell omfangsauke for dei momenta som vart trekt opp i saka frå mars '21.

Dette omhandlar:

- Avlaupspumpestasjon
- Meirarbeid for å hindre utglidning av Håtuftvegen
- For låge rammer knytt til prosjektering og administrative kostnader

- Prosjekteringsunderlag har vore ufullstendig og tilpasningar/endingar har måtte bli tatt undervegs
- Fjellsikring, generelle sikringstiltak, trafo etc

Økonomi

	Vedtatt totalbudsjett pr mars , '21	Framlegg til auke pr oktober '21		Nytt framlegg totalbudsjett pr oktober '21
Sum	85 400 000	4 900 000		90 300 000

Alle tal eks mva

Fordeling Vatn/Avløp	
Vatn	3 000 000
Avlaup	1 900 000

Totalbudsjett fordeling Vatn/Avløp 2021	
Vatn	32 700 000
Avlaup	4 540 000

Prosjektet er utelukkande finansiert av lånemidlar over VA-budsjettet.

Vedteke budsjett tek utgangspunkt i ei kalkyle frå 2017. Prosjektet var då på forprosjektstadiet. Det vart kun lagt inn budsjettpost for usikkerheit på 10% i fasen. Det vart ikkje gjort ei ny kalkyle i samband med detaljprosjekteringa. I det nye reglementet for investeringsprosjekt i Alver skal det utarbeidast ei kalkyle i kvar fase av eit investeringsprosjekt slik at ein fangar opp endingar i prosjektet, som f.eks behovet for ein ny avlauspumpestasjon. Risikoavsetning bør vere minst 20 % i denne fasen av denne typen prosjekt. For reine VA-prosjekt har fasen generelt ein usikkerheit på 30 %. Usikkerheita skal vurderast for det enkelte prosjekt basert på eigen risiko og sårbarheitsanalyse, og kan etter vurdering settast høgare når risiko vert vurdert som høgare enn normalt. Etter kvart som prosjektet går over i nye fasar skal usikkerheit vurderast på nytt. Ein skal også gjere berekning som viser forventa lønns- og prisauke i prosjektperioden.

Dersom ein hadde brukt dei nye retningslinjene i planlegginga av prosjektet er det sannsynleg at ROS-analysen ville vist at det var behov for ein stad mellom 20-30% usikkerheitsavsetning i budsjettet. Dette ville utgjort om lag 20 mill når vi ser på den samla kostnaden prosjektet vil få. Pr oktober -21 har prosjektet bede om ei rammeauke på 14,6 mill.

Som det går fram av saksutgreiinga over er kostnadsauka ein kombinasjon av uforutsette hendingar og endingar som ikkje har vore tatt høgde for. I tillegg har budsjettet til prosjektering, byggeleing og administrasjon vore for lågt, samanlikna med kompleksiteten i prosjektet. Det vil i framtida vere viktige å gjere ein konkret vurdering av det enkelte prosjekt for heile prosjektperioden når ein set opp kostnadskalkyla for å sikre realisme i tala.

Arkiv: <arkivID><jplID> FA-U62
JournalpostID:
Sakshandsamar:
Dato: 02.11.2021

Saksframlegg

Saksnr.	Utval	Møtedato
034/21	Utval for helse og omsorg	09.11.2021
101/21	Alver formannskap	11.11.2021
	Alver kommunestyre	

Søknad om å etablere vinmonopol på Lindås

Rådmannen sitt framlegg til vedtak:

Alver kommune sender ein førespurnad til AS Vinmonopolet om etablering av vinmonopol på Lindås.

Politisk handsaming

Saka skal til uttale i utval for helse og omsorg 09.11.21

Saka skal til innstilling i formannskapet 11.11.21

Saka skal avgjerast i kommunestyret 25.11.21

Bakgrunn

Lindås Senterbygg AS har sendt ein førespurnad om kommunen kan bidra i arbeidet med å etablere eit vinmonopol på Lindås. Det er kommunen som i første omgang må sende ein formell førespurnad til Vinmonopolet om etablering av nye vinmonopol. Denne saka skal avgjere om kommunen skal sende ein slik førespurnad eller ikkje.

Saksopplysningar:

Vinmonopolet vil ved utgangen av 2021 ha om lag 240 butikkar i landet, og Alver kommune har to av desse utsala, i Knarvik og på Manger. Lindås Senterbygg AS har sendt ein førespurnad til kommunen om å etablere vinmonopol på Lindås. Dei fortel at det er stor etterspurnad frå lokalbefolkning og at dei ønskjer å samarbeide med kommunen om ei slik etablering.

Vinmonopolet har etablert eigne prosedyrer for opning av nye vinmonopol. Prosessen startar i kommunen, som først gjer eit politisk vedtak om kommunen ønskjer å søkje om nye polutsal. Ved positivt vedtak sender kommunen ein førespurnad til Vinmonopolet. Når Vinmonopolet mottar førespurnad blir kommunen aktiv og Vinmonopolet gjennomfører ei djupare analyse av kommunen. Analysa vurderer ulike forhold som kan påverke venta sal i kommunen. Det er venta sal som avgjer om det er grunnlag for etablering, og kva butikk-kategori som er aktuell. Analysa baserer seg på fem nøkkelfaktorar:

- Kjøpekraft
- Busetting
- Avstand til næraste vinmonopol
- Tettstad/handlesentrum
- Ad hoc-faktorar (Turisme, hytter, nærleik til hovudfartsåre, grensehandel, ferjetrafikk m.m)

Alle aktive kommunar er med i Vinmonopolet si årlege vurdering av nye butikkar. Styret i Vinmonopolet vedtar kvar haust nye butikketableringar for neste år. Etter styrevedtaket søkjer Vinmonopolet om salsløyve i kommunen. Vinmonopolet søkjer etter eigna lokale for utsal, det blir annonsert gjennom lokal presse.

Vinmonopolet legg vekt på at lokale er i nærleiken av anna handel, gode parkeringsforhold, alt på eitt plan og løysing for varelevering. Det er til slutt kommunen som godkjenner lokale som Vinmonopolet har valt ut. I dei fleste tilfelle opnar butikkane frå 6 – 12 månader etter at vedtak om butikketablering er fatta.

Vurdering:

Lindås er definert som eit lokalsenter i Alver kommune, og er særleg viktig for dei som bur i den nordre delen av kommunen. I moglegheitsstudien for lokal- og nærsenter, gjennomført våren 2021, er eit lokalsenter definert som eit senter med ulike funksjonar, handel og tenester, idrett- og kulturtilbod som er dimensjonert for eit større lokalområde i kommunen. Eit lokalsenter kan innehalde meir enn 3000 m2 bruksareal for detaljhandel og har fleire funksjonar enn eit nærsenter.

For å bygge opp eit attraktivt senter, er det viktig å ha eit breitt tilbod for dei som bur i og rundt senteret. Senteret på Lindås er i ein utviklingsprosess og har kommunisert tydeleg at dei ønskjer å få på plass ulike tilbod, slik at senteret og området blir meir attraktivt. I september 2021 blei det etablert apotek på Lindås, eit tilbod som lenge har vore etterlengta.

Vinmonopolet sitt samfunnsoppdrag er å sikre ansvarleg sal av alkohol, og gjennom denne rolla skal dei aktivt jobbe for å avgrense skadeverknader av alkohol. Alver har i dag vinmonopol i Knarvik og på Manger. Lindås senter ligg i ein annan del av kommunen og det kan derfor vere naturleg å plassere eit vinmonopol i dette området. Eit vinmonopol kan vere med på å løfte attraktiviteten, ettersom det blir eit breiare tilbod til innbyggjarane som bur i denne delen av kommunen. I tillegg kan eit vinmonopol vere med på å byggje opp under Lindås si rolle som eit lokalsenter for eit større område i kommunen. Om det er aktuelt å plassere eit vinmonopol på Lindås, vil kome fram av Vinmonopolet si eiga analyse av kommunen.

Rådmannen rår til at Alver kommune sender ein førespurnad til Vinmonopolet om etablering av vinmonopol på Lindås.

Vedlegg i saken:

02.11.2021 Vedlegg_Lindås Senterbygg AS

1634826

Arkiv: <arkivID><jplD> FE-026
JournalpostID:
Sakshandsamar:
Dato: 29.10.2021

Saksframlegg

Saksnr.	Utval	Møtedato
102/21	Alver formannskap	11.11.2021
	Alver kommunestyre	

Utviding av IKT Nordhordland kommunalt oppgåvefelleskap

Rådmannen sitt framlegg til vedtak:

1. Alver kommune vedtar at **IKT Nordhordland kommunalt oppgåvefelleskap** vert utvida med Aurland kommune.
2. Alver kommune vedtar samarbeidsavtalen for **IKT Nordhordland kommunalt oppgåvefelleskap** slik den ligg føre.

Politisk handsaming

Saka skal til innstilling i formannskapet

Saka skal avgjerast i kommunestyret

Saksopplysningar:

Aurland kommune har hatt som mål å få til ei IKT-drift- og digitaliseringsutvikling i tråd med stadig aukande nasjonale og lokale forventningar. Kommunen ønskte å etablere eit meir føremålstenleg IKT-samarbeid for kommunen, der dei kunne oppnå høgare satsing på digitalisering og betre tenester knytt til IKT-drift.

Målsetninga for Aurland kommune er å få så god og profesjonell drift som mogeleg.

Aurland kommune evaluerte fleire ulike IKT-samarbeid. I hovudsak skilte IKT Nordhordland seg ut i forhold til ein gjennomarbeidd styringsmodell med særskilt satsing innafor Digitalisering og innovasjon, i tillegg til dei gode tenestene knytt til IKTNH. Det vart og lagt vekt på det nære samarbeidet med Digi Vestland.

Aurland har sidan 2020 hatt ei stor prosjektgruppe som har jobba med kartlegging og utarbeiding av sakspapir for å komme fram til ei riktig beslutning.

Aurland kommune har i utgreiinga si kome fram til at dei ønskjer å samarbeida med IKTNH. Både i formannskapet og kommunestyret har rådmannen sin tilråding vore einstemmig godkjent.

1. *Tilråding frå rådmannen: Aurland kommune trer ut av ÅLA-samarbeidet innan IKT 31.12.2021, jamfør KS-058/11.*

2. *Rådmannen får mynde til å utarbeide avtale med IKTNH.*

3. *Avtalen vert lagt fram for godkjenning i formannskapet 10. juni og kommunestyret 17. juni 2021.*

4. *Det blir sett av kr. 500.000,- til overgangskostnader og naudsynte investeringar.*

5. *Investeringane blir finansiert ved omdisponeringar på investeringsbudsjettet, og blir lagt fram i samband med handsaminga av 1. tertial 2021.*

Basert på Aurland kommune sitt klære ønskje om deltaking i IKTNH-samarbeidet, har IKTNH og DIR/NUI greidd ut nærare detaljar kring eit slikt samarbeid. Utgreiinga konkluderer med at ei slik utviding vil vera gunstig både for Aurland kommune, IKTNH og DIR, og har følgjande tilråding:

Ei utviding vil medføre betre utnytting av kapasitet og kompetanse i IKTNH. Dette vil frigjera økonomiske ressursar som kan styrkje utviklinga av betre tenester og arbeidsprosessar. Dette gir stort potensiale for gevinstrealisering i tenesteproduksjon og innbyggjardialog.

Prosjektet rår difor til at dei auka økonomiske ressursane vert nytta til å styrke innsatsen inn mot Digitalisering

og Innovasjon sine behov i forbindelse med å utvikle fleire tenester, samt å auke servicegraden til dei eksisterande kommunane.

Endring av samarbeidsavtalen

Aurland kommune vert deltakar i § 19 samarbeidet på lik linje med dei noverande kommunane i samarbeidet. Dette medfører ei utviding av oppgåvefellesskapet og endring av samarbeidsavtalen. Styret i IKTNH har handsama den nye samarbeidsavtalen, og den er godkjent av representantskapet i IKTNH. Kommunestyra i alle deltakarkommunane, medrekna Aurland kommune, må godkjenna den nye samarbeidsavtalen før den vert gjeldande.

Vedlegg i saken:

29.10.2021	Sak 05 utgreiing IKTNH utviding Aurland kommune	1632952
29.10.2021	Protokoll representantskapsmøte 03092021	1632953
29.10.2021	Samarbeidsavtale IKT Nordhordland 2022 med Aurland	1632954

Arkiv: <arkivID><jplID> FE-231
JournalpostID:
Sakshandsamar:
Dato: 04.11.2021

Saksframlegg

Saksnr.	Utval	Møtedato
103/21	Alver formannskap	11.11.2021

Gebyr- og betalingssatsar - prinsipp

Rådmannen sitt framlegg til vedtak:
Meldinga vert teke til orientering

Politisk handsaming

Saka skal avgjerast i formannskapet

Sjå vedlegg, gebyr og betalingssatsar – prinsipp.

Sak, gebyr- og betalingssatsar for 2022, skal handsamast i formannskapet og kommunestyret i desembermøta.

Vedlegg i saken:

04.11.2021	Gebyr og betalingssatser - prinsipp	1636665
04.11.2021	Gebyr og betalingssatsar 2021	1636668



ALVER
KOMMUNE

Gebyr og betalingssatsar Alver kommune

Lover og forskrifter
Fakta og prinsipp
Til vurdering

Oppdatert 4.11.21



Innhold

1. Oppvekst.....	3
1.1. Skulefritidsordning (SFO).....	3
1.2. Barnehage	3
1.3. Vaksenopplæring.....	4
2. Kulturskule.....	4
3. Helse- og omsorgstenester.....	5
3.1. Gebyr og tilsynsavgift på alkohol- og tobakk området	5
3.2. Institusjon	5
3.3. Heimebaserte tenester, praktisk bistand og rettleiing	6
3.4. Måltid, transport og bruk av aktivitetssenter	6
3.5. Velferdsteknologi	7
4. Vatn, avløp, feiing og renovasjon	7
4.1. Vatn, avløp.....	7
4.2. Renovasjon og slam.....	8
4.3. Feiing og tilsyn.....	9
5. Festeavgifter og andre avgifter gravplassforvaltning.....	10
6. Leigeprisar bygg og anlegg	10
7. Teknisk forvaltningsteneste (Byggesak, arealplan og geodata)	10

1. Oppvekst

1.1. Skulefritidsordning (SFO)

Lover og forskrifter som regulerer:

Vedtekter for skulefritidsordninga (SFO) i Alver kommune

Betaling er regulert i kapittel 5 i forskrifta.

Forskrift om beregning av samlet selvkost for kommunale og fylkeskommunale gebyrer (selvkostforskriften)

Fakta og prinsipp:

Den delen av kostnadene som ikkje vert dekkja av foreldrebetaling må dekkast av kommunen sine ordinære inntekter.

Kommunen gir reduksjon i foreldrebetalinga for SFO på 1. til 4. trinn slik at den per elev utgjør maksimalt 6 % av inntekta til hushaldet. Ordninga gjeld for kommunale skulefritidsordningar.

Korttidsplass 0-6 t/v

Halv plass 7-14 t/v

Heil plass 15 t/v eller meir.

Søskenmoderasjon: 30 % for 2. barn og 50 % frå og med 3. barn

Fakturerings skjer 11 gongar pr. år for barn med tilbod om 11 månader. Juli er betalingsfri månad. Barn som har tilbod om SFO 10 månader, betaler for 10 månader.

Til vurdering:

- | | |
|-------------------------------------|-----------------------------|
| • Finansieringsgrad | Ikkje fastsett i forskrifta |
| • Struktur på oppdeling av plassar. | Krev forskriftsendring |
| • Innretning av søskenmoderasjon | Krev forskriftsendring |

1.2. Barnehage

Lover og forskrifter som regulerer:

Lov om barnehager (Barnehageloven) § 20

Forskrift om foreldrebetaling i barnehagar

Fakta og prinsipp:

Kommunen skal behandle private barnehagar som mottar tilskot, likeverdig med kommunale barnehagar.

Foreldrebetalinga er regulert med ein statleg makspris fastsett i statsbudsjettet.

Fakturerings skjer 11 gongar pr. år for barn med tilbod om 11 månader. Juli er betalingsfri månad. Barn som har tilbod om SFO 10 månader, betaler for 10 månader.

Til vurdering:

- Finansieringsgrad (lågare foreldrebetaling enn maksimumsats)
- Struktur på oppdeling av plassar.
- Innretning av søskenmoderasjon

1.3. Vaksenopplæring

Lover og forskrifter som regulerer:

Lov om grunnskolen og den vidaregåande opplæringa (opplæringslova) § 13-6

Forskrift om beregning av samlet selvkost for kommunale og fylkeskommunale gebyrer (selvkostforskriften)

Fakta og prinsipp:

Kommunestyre vedtek betalingssatsar for vaksenopplæringa. Betalingssatsane gjeld for dei som etter lovverket ikkje har rett på gratisvaksenopplæring. I praksis gjeld dette arbeidsinnvandrarar.

Til vurdering:

- Finansieringsgrad.
- Organisering av tilbodet.
- Innretning moderasjonsordningar. Inkludert aldersgrense på 25 år for ungdom.

2. Kulturskule

Lover og forskrifter som regulerer:

Lov om grunnskolen og den vidaregåande opplæringa (opplæringslova) § 13-6

Forskrift om beregning av samlet selvkost for kommunale og fylkeskommunale gebyrer (selvkostforskriften)

Fakta og prinsipp:

Kommunestyre vedtek betalingssatsar for kulturskulen.

Til vurdering:

- Finansieringsgrad.
- Organisering av tilbodet.
- Innretning av søskenmoderasjon.
- Redusert eigenbetaling.

3. Helse- og omsorgstenester

3.1. Gebyr og tilsynsavgift på alkohol- og tobakk området

Lover og forskrifter som regulerer:

Forskrift om omsetning av alkoholholdig drikk mv. (alkoholforskriften) § 6.2

Forskrift om registrerings- og bevillingsordning for tobakksvarer mv

Forskrift om etablererprøve for daglig leder av serveringsstae § 7

Fakta og prinsipp:

Kommunen følger til ei kva tid gjeldande statleg gebyrsats for faste sals- og skjenke løyve og ambulerande/einskild løyve som er regulert i alkoholforskrifta § 6.2. Gebyrsatsane vert årleg regulert av Helsedirektoratet. Det same gjeld gebyrsatsar for kunnskaps- og etablererprøve.

Tilsynsmyndigheten kan krevje en årleg tilsynsavgift frå salsstadar for tobakksvarer og tobakkssurrogat til forbruker på 4800 kroner. Frå midlertidige salsstadar kan tilsynsmyndigheten krevje ein årleg tilsynsavgift på 1280 kroner. (§ 33 Forskrift om registrerings- og bevillingsordning for tobakksvarer mv)

Til vurdering:

Fastsetjing av tilsynsavgift salsstadar for tobakksvarer og tobakkssurrogat til forbruker innan lova sine maksimalsatsar.

3.2. Institusjon

Lover og forskrifter som regulerer:

Lov om kommunale helse- og omsorgstjenester mm.(helse- og omsorgstjenesteloven) § 11-2

Forskrift om egenandel for kommunale helse- og omsorgstjenester, kapittel 1

Fakta og prinsipp:

- Prisen for korttidsopphald per døgn vert fastsett av staten.
- Ved korttidsopphald over 60 døgn er betalinga det same som ved langtidsopphald.
- Prisen på langtidsopphald vert fastsatt utifrå inntekt etter reglane i forskrifta.
- Maksimalprisen på eit langtidsopphald i sjukeheim er 81.600,- kroner per måned og i Radøy interkommunale busenter 108.600,- kr per måned. Maksimalsatsen er rekna ut i frå gjennomsnittleg reell opphaldsutgift pr. plass. Det er rekna ut ein eigen maksimalpris for Radøy interkommunale busenter då busenteret har ei anna pasientgruppe enn dei andre sjukeheimane.
- Ektefelle, sambuar eller registrert partner som bur saman med pasient i institusjon betaler ein døgnats som er lik satsen for korttidsopphald.

Til vurdering:

Grad av finansiering. Kan setje lågare maksimalpris.

3.3. Heimebaserte tenester, praktisk bistand og rettleiing

Lover og forskrifter som regulerer:

Lov om kommunale helse- og omsorgstjenester mm.(helse- og omsorgstjenesteloven) § 11-2
Forskrift om egenandel for kommunale helse- og omsorgstjenester, kapittel 2

Fakta og prinsipp:

Kommunestyret vedtek og justerer eigendelsatsane for helse- og omsorgstenester ein gong i året. Unntak gjeld for satsane som vert fastsett av staten ved årsskifte kvart år.

Eigendel per måned for heimetenester i hushald med inntekt under 2 G:

Forskrift gitt med heimel i lov av 24. juli 2011 nr. 30 om kommunale helse- og omsorgstenester m.m. Forskriftens § 10 fastset maksimumssats for vederlag for heimetenester i husstandar med samla skattbar nettoinntekt før særfrådrag under 2 G. Alver kommune vedtek å bruke statens maksimalsats for vederlag for heimetenester i hushald med inntekt under 2 G. Satsane for hushaldsinntekter ut over 2G fastset kommunen sjølv på fritt grunnlag, men avgrensa til kommunens sjølvkostbeløp.

Sjølvkost for tenesta:

Sjølvkostbeløpet er den maksimalsats kommunen kan ta for desse tenestene.
Utrekningsmåten er i forskriften fastsett til gjennomsnittlig timelønn for den tenesta som utførast + sosiale kostnader tillagt 10 % i administrasjonsutgifter.
Sjølvkostbeløpet for 2022: kr. 348,- pr. time.

Til vurdering:

Om eigendel skal følgje statens maksimumssatsar inntil 2G og kommunen sin sjølvkost over 2G.

3.4. Måltid, transport og bruk av aktivitetssenter

Lover og forskrifter som regulerer:

Lov om kommuner og fylkeskommuner (kommuneloven) § 15-1
Forskrift om beregning av samlet selvkost for kommunale og fylkeskommunale gebyrer (selvkostforskriften)

Fakta og prinsipp:

Priser på kost er basert på sjølvkost. Satsar for sjølvkost vert fastsett kvart fjerde år.
Priser på transport er basert på Skyss (Vestland fylkeskommune) sine billettprisar.
Priser for bruk av aktivitetssenter gjeld berre kost og transport.

Til vurdering:

Finansieringsgrad (100 % i dag)

3.5. Velferdsteknologi

Lover og forskrifter som regulerer:

Lov om kommuner og fylkeskommuner (kommuneloven) § 15-1

Forskrift om beregning av samlet selvkost for kommunale og fylkeskommunale gebyrer (selvkostforskriften)

Fakta og prinsipp:

Tenesta er gratis for alle som får velferdsteknologi som erstatning for anna helsehjelp.

Dei som har velferdsteknologi som ein ekstra service frå kommunen betaler for tenesta.

Pris på velferdsteknologi er basert på sjølvkost. Pris på velferdsteknologi er satt noko lågare enn sjølvkost for å forhindre at pris vert eit insentiv til å velje vekk teknologi.

I hushald med inntekt under 2 G vedtek kommunen å nytte statens maksimalsats for vederlag for heimetenester også til dei som har velferdsteknologi. Dei som har inntekt under 2 G slepp dermed å betale om ein allereie betalar statleg sats for heimehjelp. For andre er det fastsett betalingssats.

Til vurdering:

Finansierungsgrad (i dag noko lågare en sjølvkost)

4. Vatn, avløp, feiing og renovasjon

4.1. Vatn, avløp

Lover og forskrifter som regulerer:

Lov om kommunale vass- og avløpsanlegg (vass- og avløpsanleggslova)

Forskrift om begrensning av forurensning (forurensningsforskriften)

Forskrift om vass- og avløpsgebyr i Alver kommune

Forskrift om beregning av samlet selvkost for kommunale og fylkeskommunale gebyrer (selvkostforskriften)

Fakta og prinsipp:

- Alver kommune reknar kommunale gebyr i tråd med sjølvkostforskrifta.
- Overskot frå det enkelte år skal tilbakeførast til abonnentane eller brukarane i form av lågare gebyr innan dei neste fem åra.
- Gebyra aukar som følge av investeringstakten.
- Det er lagt inn jamn auke i tal abonnentar.
- Gebyrtypar:
 - **Tilknytingsgebyr** er eit eingongsgebyr som skal betalast for tilknytning til kommunalt vass- og/eller avløpsanlegg.
 - For bustad-, fritids- og landbrukseigedom skal eingongsgebyret for tilknytning utgjere eit fast beløp per buening.

- For nærings- og kombinasjonseigedom skal eingongsgebyret for tilknytning reknast etter totalt bruksareal.
- **Årsgebyr** er delt i abonnementsgebyr og forbruksgebyr.
 - **Abonnementsgebyr:** Eit fast årleg gebyr for kommunens vass- og avløpstenester.
 - Differensiert:
 - Bustad- og fritidseigedom: per bueining
 - Nærings- og kombinasjonseigedom: per brukseining
 - **Forbruksgebyr:**
 - Bustad- og fritidseigedom
 - Blir fastsett anten etter faktisk vassforbruk basert på vassmålar eller etter stipulert forbruk i høve til bruksarealet. Det vert differensiert mellom bueiningar med bruksareal inntil 90m² og over 90m².
 - Stipulert forbruk er 100 m³ for bruksareal inntil 90 m² og 200 m³ for bruksareal over 90 m²
 - Nærings- og kombinasjonseigedom
 - Blir fastsett etter faktisk vassforbruk basert på vassmålar.
- Ved utrekning av årsgebyr vert avløpsmengda i utgangspunktet sett lik vassforbruket.
- Det er ikkje lagt opp til auke i tilknytingsgebyret (eingongsgebyret). Gebyr for tilknytning skal ikkje koplust til ein bestemt del av kostnadene, men dekke ein relativ del av kommunens samla kostnader med vassforsyning og avløpshandtering.
- Vassmålarleige er heller ikkje foreslått auka. Det er eit mål om å stimulere til flest moglege tilknytningar.

Til vurdering:

- Finansieringsgrad (er i utgangspunktet 100 %)
- Forholdet mellom abonnementsgebyr og forbruksgebyr.

4.2. Renovasjon og slam

Lover og forskrifter som regulerer:

Lov om vern mot forurensninger og om avfall (forurensningsloven) §§ 30, 31, 33, 34, 37, 48, 49, 50, 79, 83 og 85.

Forskrift om innsamling og handsaming av husavfall

Forskrift for slamtømming

Forskrift om beregning av samlet selvkost for kommunale og fylkeskommunale gebyrer (selvkostforskriften)

Fakta og prinsipp:

Renovasjon:

Forskrifta ovanfor gjeld oppsamling, innsamling, transport og handsaming av hushaldsavfall i kommunane som er deltakarar i Nordhordland og Gulen Interkommunale Renovasjonsselskap IKS (NGIR).

Den som har næringsavfall, har sjølv ansvaret for at avfallet vert levert til godkjend mottak.

Alle bueiningar som fell inn under forskrifta sitt verkeområde vert omfatta av renovasjonsordninga

og er forplikta etter forskrifta.

Kommunane som er deltakarar i NGIR gjev gjennom forskrifta NGIR einerett på innsamling og handsaming av hushaldsavfall innanfor forskrifta sitt verkeområde. NGIR kan tildela heile eller delar av eineretten til eventuelle dotterselskap.

Renovasjonsgebyret vert fastsett årleg av kommunen i eige gebyrvedtak etter innstilling frå representantskapet i NGIR. Renovasjonsgebyret skal dekkja alle NGIR sine kostnader i samband med oppsamling, innsamling, transport og handsaming av hushaldsavfall.

Gebyrsatsane kan differensierast for å fremja avfallsreduksjon, kjeldesortering og gjenvinning. Differensiering kan skje på bakgrunn av avfallsmengd, avfallstypar, materialgjenvinning mv

Slam:

Gjeld tømning, transport og handsaming av slam og sanitært avløpsvatn frå slamanlegg. Gebyra skal dekke kommunen sine kostnader med å utføre tenesta.

Alle eigedomar med slamanlegg i kommunen som kan tømmast etter krava i § 8 omfattast av slamtømmeordninga.

Alle som vert omfatta av ordninga, inkludert dei tilknytt private fellesanlegg, plikter å betale eit årleg gebyr fastsett av kommunen etter Forureiningslova sin § 34. Gebyret dekker ordinær tømning. Kostnader ved ekstratømning/naudtømning kjem i tillegg til ordinært gebyr, og skal belastast abonnent.

Til vurdering:

Renovasjon:

- Organisering av tilbodet. Krev forskriftsendring

Slam:

- Organisering av tilbodet. Krev forskriftsendring

4.3. Feiing og tilsyn

Lover og forskrifter som regulerer:

Lov om vern mot brann, eksplosjon og ulykker med farlig stoff og om brannvesenets redningsoppgaver (brann- og eksplosjonsvernloven)

Forskrift om brannførebygging (§17)

Forskrift om beregning av samlet selvkost for kommunale og fylkeskommunale gebyrer (selvkostforskriften)

Fakta og prinsipp:

Sjølvkostområde med 100 % finansiering.

Sjølvkostfondet er positivt og avgiftene treng ikkje aukast dei næraste åra. Satsane slik dei har vert i 2020 og -21 blir vidareført.

Til vurdering:

Finansierungsgrad.

5. Festeavgifter og andre avgifter gravplassforvaltning

Lover og forskrifter som regulerer:

Lov om gravplasser, kremasjon og gravferd (gravplassloven)

Fakta og prinsipp:

Avgifter blir fastsatt av kommunen etter forslag frå gravplassmynde.

Til vurdering:

6. Leigeprisar bygg og anlegg

Fakta og prinsipp:

Leigeprisane skal vere med å skape mest mogleg aktivitet i kommunale idretts- og kulturbygg for frivillige lag og organisasjonar i Alver.

Frivillige organisasjonar i Alver kommune skal ikkje betale leige for organisert aktivitet for barn og unge (opp til og med 19 år).

Skilje mellom frivillige organisasjonar og private heimehørande i Alver kommune og dei som er frå andre kommunar.

Til vurdering:

Prisnivå/inntektsgrunnlag.

7. Teknisk forvaltningsteneste (Byggesak, arealplan og geodata)

Lover og forskrifter som regulerer:

Lov om planlegging og byggesaksbehandling (plan- og bygningsloven) § 33-1

Lov om eigedomsregistrering (matrikkellova) § 32

Forskrift om eiendomsregistrering (matrikkelforskriften) § 16

Lov om eierseksjoner (eierseksjonsloven) § 15

Lov om vern mot forurensninger og om avfall (forurensningsloven) § 52a jf. Forskrift om begrensning av forurensning (forurensningsforskriften) § 2-12.

Forskrift om gebyr for behandling av konsesjons- og delingssaker § 1

Lov om jakt og fangst av vilt (viltloven) § 40, jf. Forskrift om kommunale og fylkeskommunale viltfond og fellingsavgift for elg og hjort § 6

Forskrift om beregning av samlet selvkost for kommunale og fylkeskommunale gebyrer (selvkostforskriften).

Lokal forskrift om gebyr for teknisk forvaltning (for Alver kommune)

Fakta og prinsipp:

- Gebyra vert fastsatt etter sjølvkostprinsippet.
- Det kan ikkje takast gebyr for rettleiing etter forvaltningslova og handsaming av klagesaker.
- Gebyr for handsaming av planforslag kan omfatte kommunen sitt arbeid fram til planen vert lagt ut på førstegongs høyring.
- Det kan ikkje takast gebyr for områderegulering eller detaljreguleringsplanar fremja av det offentlege.
- Det vert brukt standardsatser med utgangspunkt i gjennomsnittleg tid og ressursbruk for dei ulike sakstypene.
- Gebyr for handsaming av søknadar som krev vedtak etter andre lovverk som t.d. jordlova, forureiningslova kjem i tillegg til gebyret etter plan – og bygningslova.
- Det vert fakturert sakshandsamings gebyr per tiltak/teneste som det vert søkt om. For fleire av tenestene er det tilleggsgebyr knytt til volum, areal/tal bueiningar.
- For dispensasjonssaker vert det teke eitt gebyr for handsaming av dispensasjon. Gebyr for dispensasjon kjem i tillegg til eventuelle basisgebyr per tiltak der dette er søkt om i same søknad.
- Det vert teke gebyr for mangelfull søknad i samsvar med sjølvkostprinsippet om at kommunen kan ta gebyr for dei oppgåvene som er nødvendig for å produsere tenestene.

Til vurdering:

- Finansieringsgrad (er i utgangspunktet 100 %)
- Størrelsen på gebyra i høve til kvarandre. (For å halde på finansieringsgraden må reduksjon i eit gebyr medføra tilstrekkeleg auke i eit anna gebyr for å dekkja inntektstapet.)

Arkiv: <arkivID><jplD> FE-033
JournalpostID:
Sakshandsamar:
Dato: 26.10.2021

Saksframlegg

Saksnr.	Utval	Møtedato
104/21	Alver formannskap	11.11.2021

Melding/orientering til formannskapet 11.11.2021

Rådmannen sitt framlegg til vedtak:

Meldinga vert teke til orientering.

Politisk handsaming

Saka skal avgjerast i formannskapet

Melding/orientering:

- BKK – trafostasjon i Knarvik, orientering i starten av møtet
- Nordhordlandspakken, orientering i starten av møtet
- Alverbadet – invitasjon til samarbeid, sjå vedlegg
- Økonomi
- Investeringsprosjekt
- Prosjektstilling til HO-prosjekt og auka legeressurs, sjå vedlegg
- Lonena, status etter møte med grunneigarar
- Dekksak Hjelmås
- Oppfølging åpenhetsrapport, sjå vedlegg

Vedlegg i saken:

26.10.2021	Alverbadet - invitasjon til samarbeid	1631065
04.11.2021	04.11.21. Notat om auka kapasitet prosjekt og legeressurs	1636573
04.11.2021	Oppfølging Åpenhetsbarometer Alver 11.11.21	1636577